

«Esser vinavant la ferma fracziun»

Partida liberaldemocratica ils liberals

DA GION NUTEGN STGIER / ANR

■ **La finamira dals liberals grischuns è d'esser sumenter las elecziuns chantunales vinavant la pli gronda fracziun en il parlament grischun. Da preschent ha ella 34 sezs. Defender vul la pld da noss chantun er il sez da cusseglier guvernativ Christian Rathgeb.** Tradizionalmain ha l'apéro da Bumaun da la Partida liberaldemocratica ils liberals dal Grischun (pld) gi lieu en il chastè dal vicultur *Gian-Battista von Tschärner* a La Punt/Rehanau. L'interess per quel è stà fitg grond e blers liberals èn segir er vegnids per assister al referat da *Livia Leu*, la nova ambassadura svizra a Paris.

Laud per Anna Giacometti

En ses pled da bainvegni ha *Bruno Claus*, il president da la pld dal Grischun, ditg che l'occurrènza da Bumaun saja er gist il mument per engraziar a l'atgna gliעד. Quella haja gronds meritis che la pld haja success sin champ communal, regiunal, chantunal ed er federal. Cusseglier dals chantuns *Martin Schmid* presta lavur eccellente e quai saja er il cas tar cusseglier guvernativ *Christian Rathgeb*. Sin champ communal haja la pld intgins presidents da vischnanca e cun *Urs Marti*, il president da la citad da Cuir, e *Tarzisius Caviezel*, il landamma da Tavau, er dus presidents communal da dus gronds lieus. Menziunà ha Claus lura er *Anna Giacometti*, la presidenta communal da la vischnanca Bregaglia, ella che haja

prestà fitg buna lavur a chaschun da las bovas da Bondo da l'avust 2017.

Mantegnair la qualitad e reducir ils custs

A pled è er vegnì cusseglier guvernativ *Christian Rathgeb*. El ha ditg che tar elecziuns chantunales saja pussaivel da perder fitg bler, ubain er gudagnar fitg bler. Be ina spassegiada daventan las tschernas chantunales betg per la pld grischuna. Realitad saja ch'il parlament dovria per la proxima perioda da legislatura ina ferma fracziun liberala, quai en vista als affars impurtants. Tranter auter haja il parlament da tractar la lescha davart la planisaziun dal territori, la revisiun da la lescha da las scolas medias e da la polizia. Quai che pertutga ses departament saja cunzunt da tegnair pitg a las ordinaziuns da Berna en il sectur da sanadad. I dovria ferm centers, dentant sajan ils spitals regiunals er da gronda impurtanza per la prevenziun da sanadad en noss chantun. Er sch'i saja da reducir ils custs saja urgent da mantegnair la qualitad, ha ditg Rathgeb.

Terz grond partenari

Gias da la pld grischuna è stada *Livia Leu*, ella ch'è stada fin ussa delegada dal cusseglier federal per contracts commerzials ed a partir dal 2018 nova ambassadura svizra en Frantscha. La Svizra haja trais partenaris impurtants quai che pertutgia ils contracts commerzials. Quai sajan la «WTO», l'Organisaziun mundiala da commerzi, l'Uniun europeica e la «FHA», l'Organi-



La direziun da la pld grischuna cun la referenta da la saira: *Martin Schmid*, *Livia Leu*, *Bruno Claus* e *Christian Rathgeb* (da san.).

FOTO G. N. STGIER

saziun per commerzi liber. 384 milliardas francs munta la summa svizra tar il commerzi cun l'exteriur, ha ditg Leu. La summa da commerzi cun be pajais che fan part

da l'Uniun europeica gascha tar 264 milliardas francs. Entaifer quellas naziuns saja la Svizra il terz grond partenari da commerzi. Dasper la Germania sajan ils Stadis

Undis da l'America e la China dus ulteriurs gronds partenaris da commerzi per la Svizra. Gist la China daventa adina pli impurtanta sco partenari per commerzi.